

Powšitkowne WOZJEWJENJA

njedźelu, 12. nowembra 2017

TCM „Łužica pomha“ – Pomocna akcija za Pólsku

Dom za samostejace žony z dźěćimi w Ełku w sewjernej Pólskej chce Towarstwo Cyrila a Metoda z.t. lětsa ze swojej akciju „Łužica pomha“ podpěrać. Zběra pjenježne dary runje tak kaž drastu, higieniske wěcy a wšo dalše, štož je tež w swójbje trěbne. Nadrobniše informacije k tomu su w Katolskim Posole wozjewjene.

Zetkanje samostejacych w Smochćicach

Samostejacy ze serbskich wosadow su na swoje přichodne zetkanje sobotu, 9. decembra, w 14 hodź. do Domu biskopa Bena w Smochćicach přeprašeni. Zajimcy njech so prošu hač do pjatka, 1. decembra, w redakciji Katolskeho Posola přizjewja, telefonowe čisło (0 35 91) 55 02 12.

Kak dźěći za Boha zahorić?

Worklečanske dekanatne dušepastyrstwo dźěći přeprašuje čestnohamtskich pomocnikow, kotřiž so za dźěći we wosadze angažuja, a dalších zajimcow na wječork k temje „Kak dźěći za Boha zahorić?“. Referent za dźěćacu pastoralku Drježdžansko-Mišnjanskeho biskopstwa, Stephan Schubert, poda pokiwy ke katechezam a k wšelakim poskitkam za dźěći we wosadach. Wječork zahaji so wutoru, 14. nowembra, w 19.30 hodź. we Worklečanskim Don Boskowym domje.

Maćična akademija

K temje „Wuwice serbskeho stawiznopisa w NDRskim času“ přednošuje Alexander Pólk štwórtk, 16. nowembra, w 19.30 hodź. w Budyskim hosćencu „Wjelbik“, Žitna 7. Młody serbski stawiznar, kotryž bydli w Budyšinje, předstaji rezultaty swojeho masterskeho dźěla, kotrež je lětsa na Techniskej uniwersiće w Drježdžanach wotzamknył. Přednošk budže w serbskej rěči, zastup je darmotny.

Přednošk k demency

W Chróšćanskim Domje swjateje Ludmile budže pónđzelu, 20. nowembra, w 19 hodź. přednošk k temje „Demenca změní wšitko pola wšitkich“.

Jězba za serbskich młodostnych do Dachauwa

Towarstwo Cyrila a Metoda z.t. a Worklečanske dekanatne dušepastyrstwo młodžiny přeprašujetej składnostnje 75. posmjertnin zbóžneho kapłana Alojsa Andrickeho młodostnych wot 9. lětnika klětu wot soboty do njedźele, 3. do 4. februara, na jězbu do Dachauwa a Mnichowa. Předwidžany plan je w Katolskim Posole wozjewjeny. Tuta jězba by móhla tež hodowny dar młodostnemu być.

Hodowne dary za dźěći a swójby w Čěskej a Bołharskej

Towarstwo swjateje Filomeny z.t. chce tež lětsa dźěći a swójby w čěskim Dolním Podluží kaž tež bołharskim Razgradze a wokolnych wsach z hodownymi pakćikami zwjeselić. Nadrobniše informacije k tomu su w Katolskim Posole wozjewjene.